

東福山門地震傾倒秀吉公賜可修補之狀并御朱印而造營之

同年十一月廿十日

東福寺領所々散在改之令寄附末代無相違可寺納之狀御判物領之

同十七年十二月朔日

當寺門前境內地子以下令免除訖永不可有相違之狀御朱印秀吉公領之

由西... 右東福紀年錄依無類本不能校合

京城萬壽禪寺記

本寺者郁芳門院退巖道場昔六條院也郁芳諱媞子白河上皇長女右大臣顯房第一女中宮賢子者聖母也堀川帝者弟也帝事郁芳以母儀不以賢姊待之嘉保三年丙子今年十二月十七日改元永長秋七月下澣郁芳不豫八月二日大赦禱平安也夜有星隕七日甲子曉登遐二十一齡也九日丙寅上皇不任哀悼而落銚二十六日葬蓮臺寺側永長二年丁丑草郁芳遺宮為佛廬俗稱六條御堂十月十四日供養上皇出聖躬血書永劫護法願文其文曰世漸及澆季

雖屬末法不可改我此願遠可期三會曉我速證九
品者天眼鑒之我暫留三有者以怨念罰之何世聖
君非我後裔誰家賢臣非我舊僕一事一言違之背
之國主皇帝殊可加炳誠矣永長二年十月十四日
自留手痕而表信故曰御手印藤原國明寄附江州
田井鄉而仰佛法王法之庇廕康和元年正月四日
六條院火八月十二日再造供養平治元年十月二
十六日因幡堂河原院崇親院祇園離宮同時災正
嘉年中十地上人又曰尔一上人與其徒慈一上人
寶覺禪師也修淨土教慈一聞東福國師道風往扣其室

針芥相投十地亦見國師遂領玄旨二師棄教入禪
扁六條御堂曰萬壽禪寺蓋嘉曆二年相摸守平朝
臣狀云萬壽之題額起最明寺之素意弘長元年十
一月二十四日寶覺禪師旌禪苑開堂之儀翌日東
福有賀狀其略云昨日無風雨難開堂道德之至隨
喜無極於是寶覺禪師覺空禪師為兩開山文永九
年壬申十一月二十四日供養同十年十月十二日
火元德二年庚午九月二十日內親王崇明門院諱
子後宇多院皇女新賜寶地廣開紺園此樋口東高
聖母者永嘉門院倉西東洞院為界也元弘二年今年改元正慶前往畊雲原

之徒紹臨奉朝命就彼地先建報恩精舍奉安地蔵

尊容修薦永嘉門院仙駕永嘉諱瑞子中務卿宗尊親王女嵯峨院孫女後宇

多猶子嘉曆四年八月二十九日并遷四年者元德改元也崇明割尾州味岡本

莊充永嘉香燈曆應三年庚辰僧良悅附味岡新莊

六條萬壽與報恩合為一寺六條舊地今号南院報

恩舊基今日琴臺特為郁芳仙祠白河後宇多等同

嚴追修自永長上皇願文血書宸衷之所感寄田園

於此寺者甚夥焉弘長三年関白殿下以泉州長瀧

包富付與十地上人建武五年即曆應元年也一條殿下以

長瀧弥富并附之弘安九年室町院後堀川皇女寄附江

州田中莊正和元年院宣賀州富積保為祈禱賜之

貞治五年寶篋相君以備前土師卿易越中佐味庄

又大小檀施洛中園地處々有之明德四年前住濟

翁樹寄五條坊門朱雀窪田充忌辰之茶湯西京四

段綾小路室町七條猪熊六條高倉又六條坊門萬里

小路六條坊門高倉兩地為永觀都開設浴之薪水

又禪通都聞施入銅錢壹陌繕出其息為開浴之設

至德三年大内義弘梅窓居士歸附長門厚東郡吉

部鄉為浴僧之資鹿苑大相國領下鈞怙為季世證

此外有莊産田園被他剽略者勢州木造庄日置庄

三賀野莊

小倭庄内并
八知山兩鄉

三箇庄

三箇者
庄名

伊賀河合庄

拓植庄長田庄院田山田庄院田越後佐橋庄信州
仁科庄若州垣拔庄丹波豐富庄備前長田庄江州
羽田庄也又五條堀川六條坊門油小路姊小路油
小路左女牛堀川甲斐河五段寺門西面楊梅路此
本志都聞冥福之地一夕契券代々官符昭々焉等
持仁山相公大執國柄深信佛乘殊興禪叢令嗣寶
篋相君延文二年戊戌陞位於五山之列至德初元
甲子鹿苑大相國遵先相君遺命重降鈞帖定兩班
位次大方爭議不欲與之齒大相國命南禪大清天

龍德叟建仁相山東福天章各寺西堂諸勤舊等以
連署令定其班遂無異論至今受其賚永德二年乙
丑大相國以寺產之契券官符雜亂紛冗而不便點
檢之故提其綱要命門真權少府周清連書一冊準
真本稱之曰青表紙自大相國以降勝定普廣今大
丞相皆有花押實為家珍永亨六年甲寅二月十四
日六角堂曰幡堂祇園離宮等洛中人家一萬餘火
寺及其殃蕩焉成墟怪哉與平治實相類普廣相公
忝傾台恩擢開山門葉邵外英幹住持事創中興業
同九年丁巳捨播之安田東九條田園泊罪譴籍沒

之財而大殿山門文室新成矣法堂僧堂庫司浴室
溷廁琴臺諸寮等次第備矣寶德三年壬申余與住
持月谷諸老宿相謂曰大小名刹大半有十境之名
未必天造地設萬壽境中新撰十名則可矣哉即往
前往天下大老東福景南和尚請撰其名和尚一々
撰之曰十地超關大雄寶殿新花更雨枯木回春東
軒南院琴臺鏡沼三山神祠千松客廛乃結十境以
四韵一偈曰東軒虛豁包南院海上三山當處開夜
月無心臨鏡沼暮雲有意傍琴臺新華雨遂空談散
枯木春從冷坐回觀礼大雄超十地千松夾廛接方

來寶德壬申五秋日前住當山景南英文八十八歲
謹書蓋大雄寶殿南院琴臺者不改舊名也鹿苑竺
雲大和尚跋十境偈曰寺必當有十境耶十地寶覺
華路藍縷之始弘安辛巳以來百七十餘歲之間住
持者幾人寓居者幾人胡為缺焉不為之哉不當必
有十境耶仍舊貫如之何々必改作今也夫十者非
自天而降亦非從地而涌蓋出當人之胷次而竦一世
之耳目嚮者鼂夕于茲者如唯識其面而未知其名
而見其面則藹然眉目驩尔心胷頽壁毀垣古松老
柏精氣一新是所謂世必有非常之人而後有非常

之事也夫或議之者乃非常之元黎民懼焉者也然則自十地寶覺以降逸代主盟者可不謂之非常之人耶無乃不遜耶肯首於大寂定中否亨德貳禩癸酉中秋前南禪竺雲等連書康正二年丙子上杓禮部挾豪權奪味岡庄欲為東征伐資糧已入其地一日莊舍四面軍聲箭飛如雨礮走如雷禮部顛狂惶怖將自殺又已犯膚左右相救還又其救者而死矣從軍之士開門闕則寂無人聲禮部急棄其庄而不推自去烏虜天乎神乎未忘護法之勅者甚驗矣後世豪強可為鑑戒之又琴臺側有石浮圖其刻曰弘

長壬戌八月二日古來稱曰旃富之塔旃富初不知名字寺莊長瀧旃富者昔彼湯沐邑也故假以名之或云郁芳之乳媪也弘長壬戌逝去則與永長丙子相隔百六十七年不足信之弘長之刻恐立塔之時耶世俗傳說郁芳者天下絕色而無閨房之染生信大乘常持蓮經故白河法皇自染宸翰寫八軸授之精進讀誦手不釋卷或時起一念清淨之慢魔伺其便奪所持蓮經第八之軸去尔來不豫而化矣乳媪哀慕之餘假觀音力入魔宮得此經而歸魔類怕經王威力回邪歸正托形於飛鷲護伽藍云雖荒唐之

說宸翰蓮經天下所識也惜乎隨永亨之燼不知燼
耶又奪耶飛鳶者不曾去如護者數日若不見則或
不祥也自永長丙子至今寬正甲申三百六十九年
郁芳事迹開山行實寺宇中創徃々苦其難知山中
耆艾少長相共請曰和尚自七齡入此保社適主丈
室宜作傳記以貽將來余謏才劣識謙拒一二固請
不允於是古老之說街童之譚寺庫契券國朝載籍
一々擿撫之盖與當世大儒宗門耆衲反復討論而
粗記顛末後來博聞君子庶幾補苴遺漏削正訛舛
則不亦善乎

寬正五年龍集甲申佛歡喜日

住持天佑梵嘏謹記

右萬壽禪寺記依無類本不能校合